



28 de decembro de 2012. SOGAMA (Sociedade Galega do Medio Ambiente), a entidade semipública que xestiona o 82% dos refugallos urbanos do país mediante a incineración e o vertido é unha das [empresas máis contaminantes de Galiza](#), e tamén unha das máis **perigosas para a saúde**

. Un recente [estudo de investigadores/as do Instituto de Saúde Carlos III de Madrid](#)

, publicado na revista Environmental International, conclúe que

a poboación que reside preto das incineradoras ten un maior risco de padecer cancro

. Porén, e malia a que este sistema é máis nocivo, caro, contaminante e insolidario que a compostaxe, o PP persiste en defendelo contra toda lóxica. A pregunta é: Quen se lucra cos refugallos a costa da nosa saúde?

NOTA: Por desgraza, esta nova non é unha brincadeira!

As **incineradoras**, como a situada no “complexo ambiental” de SOGAMA en Cerceda, revélanse segundo os expertos como **potentes emisores de substancias carcinóxicas** : Dioxinas, arsénico, cromo, benceno, hidrocarburos aromáticos policíclicos, cadmio, chumbo, tetracloroetileno, hexaclorobenceno, níquel e naftaleno, entre outros centos de tóxicos.

Segundo o [rexistro estatal de emisións e fontes contaminantes \(PRTR\)](#) SOGAMA verteu á auga e á atmosfera uns 15 kg de mercurio, 13,7 de arsénico, 5,5 de cadmio, e 21 ,4 de fenois no último periodo declarado. E isto só é a punta do iceberg: Neste rexistro, non se recollen as emisións monóxido de carbono, dióxido de xofre, outros metais pesados alén do mercurio, nen tampouco as **dioxinas e furanos**

, substancias moi tóxicas producidas pola incineración. Na incineradora quéimanse tamén produtos farmacéuticos (máis de 4.000Tm ao ano), práctica perigosa para a saúde polas emisións das substancias químicas procedentes dos medicamentos.

Entre os **tumores** que, segundo o estudo do Instituto Carlos III, poden producirse debido a cercanía das incineradoras atópase o de estómago, o de pulmón, o de pleura, o de ril e o de ovario. Ademais estes cancros poden manifestarse con maior probabilidade nas persoas que

viven a **menos de cinco kilómetros** destes emprazamentos, tal é o caso de numerosos veciños de Cerceda, parroquias de Carral, Ordes...

A ciencia dá outra volta máis argumentos para abandonar a incineración como sistema para o tratamento dos residuos. Ademais de ser unha [fraude de lei](#) é un [desbaldimento económico](#), unha hipoteca ambiental e un risco certo para cidadanía, [destrúe máis portos de traballo dos que crea](#). Irónicamente SOGAMA ten como lema “Traballamos, educamos e actuamos por un futuro sostible” É este o futuro que nos prometen?

Dende o movemento ecoloxista levamos décadas reclamando un **novo modelo de xestión de residuos** para Galiza, un sistema descentralizado baseado na redución, a separación dos residuos orgánicos ([que para SOGAMA non son reciclábeis!!](#)), e a compostaxe, para camiñarmos, como o resto de Europa, cara unha sociedade da reciclaxe. Ti tamén podes colaborar a conquistar este obxectivo asinando e recollendo apoios para a [ILP \(Iniciativa Lexislativa Popular\)](#) contra a incineración e a prol da compostaxe. Non fiques parado/a adgardando a seres envelenado/a!

Máis información:

Maria R. Lafuente, vogal de residuos de ADEGA (628378804) Fins Eirexas, secretario executivo de ADEGA (981570099)